

Il pajais dals cumpromiss

La Malaisia tranter China, Indonesia e Tamil Nàdu

DA GUIU SOBIELA-CAANITZ

■ **Tge manca tar la cumpagnia «Malaysia Airlines»? En mars è ses sgol MH370 svanì sur l'Ocean ind, millis km davent da sia ruta da la chapitala Kuala Lumpur vers la China dal nordost. Ins pudeva manegiar che quai saja in misteri dapli en in continent en sazez misterius, l'Asia.** Ma fanadur ha manà ina segunda catastrofa: L'explosiun dal sgol MH17 pervi d'ina racheta tratga da l'Ucraina da l'ost u da la Russia limitrofa. Il Boeing vegniva dals Pajais bass e sglava vers Kuala Lumpur, nua che plis passagiers levan prender in auter aviun per l'Australia. Kuala Lumpur è pia in eroport da relevanza internaziunala per la colliaziun tranter l'Europa e la Mar dal sid. Per la «Malaysia Airlines» munta il destin da quels dus sgols ina greva frida. La Malaisia è in stadi relativamain pitschen cun strusch 30 milliuns olmas, cumpareglia cun la China e l'India, mintgina passa 1 milliarda, u cun l'Indonesia, il pli grond pajais islamic dal mund cun strusch 250 milliuns. La Malaisia, pajais multifar, pluriling e multicultural, è naschida ils 16 da settember 1963 e gjauda ina situaziun sociala ed economica favuraivla; ses sistem politic

original provegn da la diversità istorica da sias regiuns.

Varietad geografica e culturala

Il linguatg principal ed uffizial da la Malaisia è il malais, scrit il pli savens cun noss alfabet. El è basà sin il dialect da Melaka, sin la costa vest da la Peninsla malaisia. En la citad da Melaka/Malaca, colonia portugaisa da 1511 fin a 1641, viva anc adina ina cuminanza da lingua portugaisa da var 5000 olmas. «En la Peninsla malaisia è 54 % da la populaziun d'etnia malaisia, 35 % da la chinaisa, e var 10 % vegnan resguardads sco descendents d'immigrants dal subcontinent ind» (1), cunzunt da l'actual stadi federativ Tamil Nàdu en l'India dal sidost. La regenza promova l'instrucziun primara en ils trais linguatgs principals (malais, chinais «mandarin» e tamil) ed il studi da l'englais, lingua da l'anteroiura pussanza coloniala. La Malaisia cumpiglia var 132 000 km² da la Peninsla malaisia (passa 23 milliuns olmas) tranter il Mar da China e l'Ocean ind; il pajais cumpiglia plinavant la part nord da l'insla da Borneo (strusch 200 000 km²) cun strusch 6 milliuns olmas ed il punct culminant da la Malaisia (4100 m). «Las duas parts dal pajais èn separadas da var 600 km da mar

sco era da grondas differenzas economicas e culturalas» (2). La Malaisia è ina monarchia federala: Il retg vegn elegi dals 9 stadis han guvernatur nominads dal retg e che na fan betg part da l'elecziun. Mintga stadi elegia in Cussegl grond; ils dus stadis da Borneo, il Sabah ed il Sarawak, sun blier pli autonom che tschels. L'equiliber tranter las religiuns merita l'attenziun da la perscrutaziun politica. L'islam sunnit (61 % da la populaziun) è la religiun dal stadi. Quest punctuescha la libertad religiosa, ma lezza n'è betg assoluta: Il dretg islamic («scharija») è impegnativ per muslimas e muslims, ils quals n'astgan per exempel betg convertir ad in'otra religiun. Malais èn per regla muslims ed Inds hinduists. Il sistem favurisescha ils autoctons malais e l'islam, cunzunt en fatscha als descendents dals immigrads chinais. Tgi che s'interessa per l'islam en il mund duai far endament la «pitschna» Malaisia, tant pli che lezza è influenzada da la vasta Indonesia limitrofa e che mintga Malais enclegia l'indonesisch senza fadia.

1. Yves Lacoste (ed.), *Dictionnaire de géopolitique*. Paris (Flammarion, ISBN 2-08-035101-X) 1995, p. 957, chavazzin «Malaysia».
2. Yves Lacoste (sco nota 1).



l'aviun da la Malaysia.